

Isa kembali ke gelanggang Umno
Malaysiakini.com
Oct 8, 2008
Muda Mohd Noor

Bekas naib presiden Umno Tan Sri Isa Samad dijangka akan masuk kembali ke gelanggang pertarungan walaupun belum mengumumkan jawatan yang akan ditandinginya dalam pemilihan parti Mac tahun depan.

Dihubungi Malaysiakini hari ini, Isa berkata, pengumuman mengenai perkara tersebut akan dibuat dalam masa beberapa hari lagi.

Ditanya sama ada beliau menunggu keputusan Presiden Umno Datuk Seri Abdullah Ahmad Badawi hari ini untuk tidak mempertahankan jawatannya, Isa berkata:

"Apa kena-mengena dengannya, tidak adalah. Tunggulah sikit... Apabila sampai waktu, saya akan umumkan, dalam beberapa hari lagi."

Bekas menteri besar Negeri Sembilan itu digantung keahliannya selama tiga tahun berhubung amalan politik wang dalam pemilihan Umno pada 2004 selepas menangi jawatan naib presiden.

Dalam pemilihan tersebut, Isa mendapat undi terbanyak mengatasi Datuk Seri Mohd Ali Rustam dan Tan Sri Muhyiddin Yassin yang masing-masing mendapat tempat kedua dan ketiga untuk jawatan tersebut.

Tempoh pengantungan Isa berakhir Ogos lalu.

Desas-desus menyebut Isa berminat merampas kembali jawatannya dalam pemilihan Mac ini.

Setakat ini antara pemimpin yang menunjukkan minat bertanding jawatan tersebut ialah ketua badan perhubungan Umno Perlis Datuk Seri Shahidan Kassim, badan perhubungan Umno Sabah Datuk Seri Musa Aman dan timbalannya Datuk Shafie Apdal.

Mohd Ali bagaimanapun menawarkan diri untuk bertanding jawatan timbalan presiden, manakala Muhyiddin pula akan mengumumkan keputusannya Jumaat ini.

Muhyiddin, yang dijangka berminat jawatan nombor dua, diramalkan berganding dengan Datuk Seri Najib Razak selepas naib presiden itu dilihat seorang tokoh utama mempercepatkan peralihan kuasa Abdullah.